

Här Mars di Bartolomeo
President vun der Deputéiertechamber
19, um Krautmaart
L-1728 Lëtzebuerg

Lëtzebuerg, de 14. Mäerz 2017

Här President,


Sou wéi d'Chambersreglement et virgesäit, bieden ech Iech, dës dréngend parlamentaresch Fro (Art. 81) un d'Madamm Ëmweltminister, d'Madamm Gesondheetsminister an den Här Minister fir Landwirtschaft a Konsumenteschutz weiderzeleeden.

De Skandal vum Baaschtnecher Schluechthaus huet europawäit fir Opreegung gesuergt. Wéineg gewosst ass, datt dat Schluechthaus och d'Fleesch vum Lëtzebuenger Label „Naturschutz Fleesch" verschafft, deen der Lëtzebuenger Ëmweltverwaltung gehéiert. An deem Kontext wéilt ech der Madamm Ëmweltminister, der Madamm Gesondheetsminister an dem Här Minister fir Landwirtschaft a Konsumenteschutz eng Rëtsch Froe stellen:

1. Ass et richtig, datt d'„Naturschutz Fleesch", ënnert dem Label vun der Lëtzebuenger Ëmweltverwaltung, zu Baaschtnech am Schluechthaus geschluecht ginn ass?
2. Ass dat de Grond, firwat beim „Naturschutz Fleesch" e relativ laangen Transport vu 90 Minutte bis bei d'Schluechthaus virgesinn ass?
3. Ass d'Wiel vum Baaschtnecher Schluechthaus haaptsächlech aus Käschtegrënn geschitt?
4. Wat fir aner Grënn gouf et, datt d'Fleesch mat engem Lëtzebuenger Label net an engem Lëtzebuenger Schluechthaus geschluecht ginn ass?
5. Wat fir konkret Grënn hu géint d'Wiel vun engem Lëtzebuenger Schluechthaus geschwat?
6. Am Laaschtenheft fir de Label „Naturschutz Fleesch" ginn op 24 Säite plus Annexen genee d'Kontrollen an Oplage beschriwwen, fir datt ee kann de Label „Naturschutz Fleesch" kréien. Kënnen déi Dammen an Häre Ministeren eis eng genee Oplëschung vun de Kontrolle maachen, déi am Kader vu Label-Aktivitéiten zu Baaschtnech gemaach gi sinn?
7. Wéi ass ze erklären, datt bei deenen ausféierleche Kontrollen, déi am Laaschtenheft festgeluecht sinn, keng Onregelméissegkeete vun de Lëtzebuenger oder vun der Lëtzebuenger Ëmweltverwaltung ugestallte Kontrolleure konnte festgestallt ginn?
8. Wéi en „neutralt agreéiert Organ" war fir déi Kontrollen zoustännech?

9. Wat bedeit „neutral" an dësem Kontext? Muss et sech ëm e net staatleche Labo handelen?
10. Ass de Verkaf vum „Naturschutz Fleesch" duerch dëse Skandal a Fro gestallt oder sinn an nächster Zäit Liwwerschwieregkeeten ze erwaarden?
11. Wéi vill Fleesch vu Produzente vum Naturschutz-Label war zu Baaschtnech am Schluechthaus fir geschluecht ze ginn oder scho geschluecht, wéi de Skandal publik ginn ass?
12. Wat geschitt mat deem Fleesch, wat zu Baaschtnech geschluecht ginn ass a wat entweder schonn zu Lëtzebuerg am Verkaf ass oder nach zu Baaschtnech an de Killraim houg?
13. Wat bedeit d'Associatioun vun de Nimm vum Schluechthaus vu Baaschtnech a „Naturschutz Fleesch" u Schued fir de Lëtzebuerger Label?
14. Denkt d'Madamm Minister drun, fir d'Lëtzebuerger Produzenten ze entschiede fir den eventuelle Schued, deen duerch d'Wiel vun engem Partner am Kader vum Label „Naturschutz Fleesch" entstanen ass?

Mat déiwem Respekt,



Fernand Kartheiser
Deputéierten